

潛江舊聞卷之四

崇雅堂叢書

潛江甘鵬雲纂述

劉阮仙學士贖宮人

南渡宮人徐氏淑秀工詩富文藻國變後流落都門劉阮仙學士肇國揮金贖之以贈友人邵某歸居泰州之枕村自號昭陽遺子爲詩多抑鬱哀憤之音鄧孝威舍人漢儀最愛其入畫無人知是我倚欄看蝶認爲花之句所刻詩觀選其詩極多其淮陰道中云昭陽遺子謫人間曾列龍樓第一班楊柳折來風雨夜芙蓉分得水雲顏不知世上無金屋猶說臺前賜玉環薄命今生遙集處傷心何地可容閒

詩載王豫江蘇詩微一百六十二卷 其身世之淒涼亦可悲矣佳人薄命流落風塵憔悴摧傷可爲歎喟幸學士憐才爲之援手贖贈友人俾得所歸亦可謂吾鄉先正之佳話矣曹瞞贖文姬千古傳爲美談以學士較之無多讓也友人王青垞語予云學士此舉與王吳廬在白門贖難婦其事略同皆前輩風義之不可沒者屬予採入舊聞亟表而出之

嵇留山哭劉阮仙詩

劉阮仙學士以順治己亥年卒於廣陵石塔寺梁溪嵇留山永仁有石塔院哭潛江劉學士詩見抱犢山房集詩云著書期後世夫子竟先徂可歎黃花節傷心白社孤人間空手澤地下辨歸途蕭寺秋風裏門生泣向隅然則學士殆以九月卒留山蓋其門人也

歐陽丞名言

歐陽丞字憲文號繫庵華亭董文敏之門人也讀書有獨見不隨人言下轉嘗言生平作老蠹魚不肯乾死案頭之螢私憾千古少真讀書人從來儒者皆保闕守殘黨枯護朽以致成見不化持論多迂臚傳發冢則詩禮爲梯白晝攫金則科第首禍內寇外賊皆以我輩爲口實而讀書種子似絕矣

康熙潛江志 予每讀其言而悲之自漢唐宋明以迄於今號讀書人者大率詩禮發家者也其中豈無傑出之士然而寡矣上下二千年固可屈指數矣試觀王莽篡漢頌功德者四十二萬人何莫非以讀書人自命者耶唐宋以後設科取士其號稱讀書人者有一不爲科名仕宦者

潛江舊聞四

二

崇雅堂叢書

耶既志在科名仕宦雖日日讀孔孟之書其於孔孟之道相去不知幾千萬里也此非予之深文也試觀明清兩代以時文取士人人讀五經四書果真讀五經四書耶亦不過讀時文題目耳是故歐陽氏恨千古少真讀書人誠哉千古少真讀書人也慮讀書種子之將絕誠哉其將絕也吾願吾邑後學聞鄉先生之遺言而惕然以興也歐陽氏所著之書不傳幸有此數言載於邑志可爲後學砥行礪名之藥石予故表而出之

吾因歐氏之言又不禁爲今之學者發深慨也方今學校徧天下以物質文明輔助精神文明此亦論學者所不廢也然試問今之學者果專在昌明學術以裨世用耶抑猶

有幾微利己之心存其中耶卽以學者自問恐亦不能自信其必無是心也先有利己之心而後求學卽其學可知卽其人亦可知矣而謂讀書種子之不絕吾不信也天下滔滔狂瀾莫挽人心陷溺舉世一轍亭林之所謂亡天下今殆其時矣又豈徒學術之不競而已耶

### 歐陽烝吏才

歐陽員外烝在明崇禎間作令有聲初宰江都繼令滑縣大都以文學飾吏治與古循吏合符而邑志載公吏蹟殊畧但云令江都五載飭躬以廉馭民以靜理簿書斷訟獄發決如神而已其敘治滑政蹟但云推誠招徠滑民從賊者悉爲良善而已纂述方志固忌繁猥然因力求簡約而

### 潛江舊聞四

### 三

崇雅堂叢書

循良政績亦遂畧而不書毋乃太簡乎檢蘄州顧黃公白茅堂集有公墓志敘公吏蹟較詳可補邑志之闕最錄於此備異日續纂邑志之材料焉

志云公崇禎十年進士不事干謁初授江都知縣江都諸少年多家無儲盜鮮衣衷革借身報讐長吏非嚴覈不稱而公以不擾治之約法小故不得訟訟令跪于庭不謝罪明日復跪久不自堪輒叩頭改悔至其發奸如神明大吏有不執法必爭如法羣少年亦斂手好士疾病喪葬昏嫁曲爲經營酬酢往來而竿牘絕上用副都御史史可法薦召見稱能曰燕魯多殘破可仍試知縣朝廷無此例朕試卿等故爾於是復知滑縣滑縣賊小袁衆數萬公身入降

之賊爲語曰卽忤爺娘莫忤歐陽

白茅堂集卷三十九

### 歐陽氏賢女

歐陽東暹年逾五十未有子妻張生一女頗慧然爲嗣續計忽忽不樂也或勸納貳室以張性嚴毅難爲言旣而娶妾張匿別館距暹居纔數武舂杵刀尺之聲相聞凡七八年張不知也暹五十九生子焯六十三生子焯兩兒孩提時數過其家張以爲鄰家兒撫慰飲食之歎曰此佳兒恨不生我家其女與僮僕皆竊笑然卒不以告也迨暹卒議立後族人故遲回無所屬而訁微以其事聞諸張張驚且喜曰此大事胡不早告我使我負不賢名遽起攜二子及其生母入而成禮焯時纔五齡耳張事嫡謹嫡卒苦節撫二孤子捍門戶課以成名宗黨賢之君子曰張氏賢矣乃其女亦賢女也能左右調護以全嫡母名成張節而庇歐陽氏宗祊不賢而能若是乎故吾嘗論此事張氏茹辛養晦勵節撫孤在古人中猶有倫比至若女之苦心將護皆在無形之中無事實可指無名可稱其所爲尤難也吾是以尤賢之

### 劉信國爲庶母持服

劉公允大令信國阮仙學士之弟官臨桂知縣少失怙恃依庶母郭以居及郭卒信國請於上引繼母例得終三年喪論者多之朱悔人先生曰昔宋皇祐間祝紳鞠於兄嫂嘗爲嫂持服又請解官持兄喪羣臣以爲言仁宗曰世有

匿親喪而于進者紳雖所服非禮然亦不忘鞠育可勸也  
信國此舉近之

康熙潛  
江縣志

### 周夢漁平反疑獄

潛江周夢漁司理廷彬順治中爲鳳翔府推官持法平允  
多所矜全有山東進士張六部者以劾陷於辟沈獄五載  
檄廷彬覆勘廉得其冤狀力白於直指出其罪張六部獻  
詩云黃雀投羅網展轉困螻蛄三公未顯時遇物生慈悲  
捎羅驅蟻去養雀成羽儀乃知聖賢心仁愛理不移賤子  
東魯士賦性狂且痴雖能讀父書不甚愛文詞存軀滄桑  
後浪藉一無資顧盼笑平原意氣許臨淄執政偶憐材收  
用及爨炊本不堪保障且復試繭絲連營百戰後貪吏那

### 潛江舊聞四

五

崇雅堂叢書

可爲苦心判涇渭良莠定剔釐燥弦更誤急無功禍卽隨  
憲典方執法下吏漫蹙眉紙上傾人命吁嗟動天揆勅下  
詳刑者非經術不宜藹藹周夫子清風灑鳳岐人傳今定  
國爭說漢釋之本值上官令檄予來公墀公墀何所見綠  
草自委蛇是日看夫子顧予淚交頤繼領直指符究詰予  
情詞宿牘舊雲黑彤管初日曦虛明照幽隱甘露噓枯枝  
五載案沉淪一朝得矜疑行將達司寇入告聖明知安得  
天下獄司理盡如茲嗟予幼失怙十年無嚴師今者內罟  
獲生我復是誰迫聞星輶發涕泗泣漣漣不如華陰鳥翩  
翩傍車駸欲憑寸草心報答三春遲

### 莫釐峯爲師立祠

莫若玉字石伯號鰲峯身丁國變葉帖括僦屋東郊外灌  
花間竹怡情詩酒泊如也性落落寡諧然樂施無倦鄉里  
稱善人幼以文詞受知邑宰陳侯夢琬終身不能忘晚年  
破產爲立祠歲時率子弟供祭祀焉其風義不可及也三  
原孫豹人枝蔚有題陳侯祠呈莫鰲峯詩陳侯祠舊在元  
真觀左今廢陳

夢琬山東  
蓬萊人

序云莫翁鰲峯名若玉年已七十矣以應試之

文受知於邑侯陳則童子時事也一日之知而終身不能  
忘於心乃重新祠堂於郊居之左歲時率子弟拜跪供祭  
祀又慮祠久而或毀也於祠內更建文昌閣庶幾邑人士  
有敬神而因及侯者慮甚周以遠也且翁家固貧一瓦一  
木破產而後成之有足感者矣陳諱夢琬字充孟壬戌進

潛江舊聞四

六

崇雅堂叢書

士癸亥筮仕潛江甲子分考楚闈所取皆知名士丁卯擢  
南璽丞靖難間有陳尙書迪者成祖欲降之不屈斷舌噴  
血罵不止以死卽公先世也壬戌闈中閱公卷者方躊躇  
取舍夜夢偉人肅謁不能言但張吻而已似有求者數夜  
皆然閱者某公疑之遂取公卷中式出闈徧詢諸門生公  
言先世狀某公驚歎傳其事余獨以爲忠義之靈豈知富  
貴爲何物不應如世所傳瑣瑣愛其後人乃自屈下如此  
主司頭腦豈別有物焉憑之耶於次章專闡此指用抒景  
仰當亦莫翁所樂聞也詩云壺殮惠亦微感激固難已鄙  
哉越石父責備在知己陳侯有祠堂乃自莫翁始無以酬  
知遇終身肅拜跪此意勝王商但厚嚴與李商爲嚴君平  
李弘立祠

嚴李雖鄉賢鄉賢寧止此子雲與文翁如何闕祭祀至於  
知我者德與生我比誰能敦古道一使薄夫恥莫翁誼誠  
篤陳公名亦美吾不慕陳公慕公門下士翁夙抱奇志腹  
中富文史使其早登朝樹立見風軌蹉跎及暮景遭逢記  
重子驥老最可傷士貧亦常耳其二云昔當成祖時靖難  
事忍論矯矯陳尙書烈烈光星辰罵聲不絕口舌斷義乃  
伸誰暇慮苗裔一死成吾仁皇天眷忠義食報在後人科  
第尋常事公然勞鬼神未必公之靈區區私所親主司誠  
冬烘得失云有因明日諸門生附會到傳聞疑惑張吻者  
必是噴血臣正氣竊所依誕罔竊所嗔作詩掃雲霧庶用  
表嶙峋

潛江舊聞四

七

崇雅堂叢書

宜莊花農

莫大岸進士與先宜莊花農傳宜莊距吾邑一舍而遙潛  
水東南流之隈水樹明瑟大有佳勝處甲寅春石戶朱先  
生避亂胥宇於此因其先世蕪田數十畝刈蓬藿編槿篠  
而卜築焉其言曰吾將以無用爲用經吾莊甚宜其經世  
有用之用吾悉授之其人矣蓋謂長公子友悔人也由是  
稱宜莊花農矣顧弗爲稼圃之學而花農自命者何先生  
志潔行高以名位爲徽纒譽處爲蘧廬雖涉末流之温蠖  
矚然弗滓于躬製芙作裳餐英當糗筮薰而猶不入誦橘  
而枳不移其天性然也花農於書無所不讀嶽負川渟莫  
闕崖畧而於物產理性特爲詣絕眎根撥而辨嫩惡訾蓓

蕾以決盛衰他人雖精心學之終莫能及凡種植家有好事往往請花農鑒別至則手自翦揉漑壅不憚勞勩經數日而萎灌者起攣蹙者舒主人歎服多掇所愛相遺者而吾友悔人雅遊所至必搜訪遠致以供晨夕歡中州牡丹之盛甲天下石固王氏園最著商邱宋相國文康公家園牡丹備五色又王氏所未有也悔人入成均爲四姓小侯師今大中丞宋牧仲先生尙居郎署與悔人忘年壇坫交一日謂之曰君能過吾梁苑者當割奇花代縞紵以資君孝若何悔人敬起謝未幾南旋迂道五六百里至商邱得奇花數種及牡丹黃綠數色不計任車僦直之費踰淮泗滌江漢以歸花翁對之色洒然喜也亟招予輩二三逸老

潛江舊聞四

八

崇雅堂叢書

揚觶酌花神傍相與屬和中丞漫堂綠牡丹詩成帙蓋前此宜莊花品稠麗未能定甲乙自是遂以牡丹爲冠冕焉花農治花與稼師治稼等攘之剔之薶炳蘊崇之欲長其兄而去其弟也覩土膏疏穢壤被以牡鞠之煙滌以蘭氏之澹欲使楛不化蝶而柎不穴蠋也向背之方早晚之候燠宜敞軒汙宜複屋谷產者避暎澤產者防霽欲其柢彊而氣遂也精微者可以養生博大者可以理世用志不分迺凝於神花農之沈冥於斯藝也而予以爲古之有道者非耶宜莊內別館數處皆因勢匠意不爲方幅而花之蒙茸敷豁若與之相賁緣連蜷者繚窳延蔓者被徑森而立者可幢縈而綴者可幄尺埒畚土皆花宅昔耶垣衣皆花



媵予時時從花農遊坐汲堂靚爽處前爲平臺方塘銜之  
如玦凭欄下窺毛髮可鑑魚鳥游泳蒹蒲離披繞塘數百  
武煙樾霍靡雲蘿藹罨繚青凝碧紫姹紅嫣泫露欲笑者  
與目謀裊風如吟者與耳謀花發無虛日賞會無虛旬落  
英藉席流觴在手詠言似綺吐屬成珠及出莊外則如從  
白雲綠嶂間瞥爾墮地不知向所自入嘻亦異矣吾嘗疑  
洞天之說之有無久矣綏山之桃邛都之橘所稱豪且樂  
者當復有加焉否耶花農經營垂二十年讀書對客之暇  
輒筆記花之所產所移種蒔之棄取喜忌色香之遷換異  
同與夫榮瘁成毀之可喜可愕及今昔人題詠都爲一編  
博而韻典而核眎草木狀虞衡志諸書蔑如也凡著書十  
餘種有遇鈔十卷異鈔十卷史畧八卷治平要錄五卷行  
世編柳堂全集則商邱中丞所鑒定又鉤纂歷代大部書  
有裨經濟實用者如歷律兵農屯漕醜鑄旁逮醫卜壬遜  
相馬種樹之書莫不審端竟委指掌析毫一一可見諸施  
行也悔人手鈔其什二三公諸海內汲古深思之士常炳  
然懸日月矣宜莊錄特緒論之一斑云花農名士尊字偉  
臣號石戶順治甲午恩選高隱不仕宜莊其別號也

### 石戶著述

朱石戶先生著述甚富湖北通志藝文考著錄其編柳堂  
詩文集則宋牧仲中丞所論定者河中吳天章雯有寄懷  
石戶翁兼示悔人詩畧云石戶先生真好竒編柳作屋潛

江湄著書搜索四千載蟲篆鳥跡岫嶁碑傳此家學亦非  
易東浦負荷千里姿竭來太學看石鼓慈明邂逅傾心期  
淵源轉仰朗陵度高霞天半何能追其爲名流所傾服如  
此同里莫進士與先稱翁所著書均有裨經濟實用惜乎  
其書不傳

朱石泉篤師友之誼

朱石泉載震生有至性師友之誼最篤初以邵陽王黃湄  
給事爲師事黃湄甚謹嗣師漁洋其事漁洋與黃湄無以  
異也黃湄之沒也石泉旣經紀其喪復致書黃湄所嘗往  
來者請竹垞銘其墓西溟表其阡漁洋爲之傳又請於其  
家蒐其遺文謀刻梓以傳而黃湄嶺海諸集遂得以次第  
曝著於世石泉之力也故漁洋之於石泉亟稱其高義不  
容口而爲東浦詩集序尤再三言之至以漢儒爲比以謂  
漢儒事師顯榮之於生前朱君事師力圖其不朽於身後  
蓋本其實而道之非溢詞也方今道德墮落禮教淪亡父  
子兄弟且視同陌路何況師友吾邑先正有此義行亟應  
表章以敦薄俗

吳朱交誼

朱悔人在京師朋輩往來倡和者有耦長吉人夏重德尹  
山掄武曹山言孟穀秋史西厓赤抒天章諸人而氣類相  
感尤稱莫逆者天章而已天章簡悔人詩云東浦先生明  
止足騎驢輦下干微祿心慕廬山三疊泉身住京華半間

屋借問先生何刺促人生那有神仙福始信作佛願太奢  
不如選官言可復我亦年來窮徹骨也在長安同鹿鹿月  
食不盡四斗米無端久別王官谷只有清夜細思量可惜  
年華如轉燭富貴神仙兩俱失阮生猶作窮途哭噫吁嘻  
南岳夫人婦人身太華毛女秦宮人皆能超詣求其真男  
兒何事甘風塵曲巷相逢還大笑何不急覓安期棗又有  
過悔人詩云長安艱旅食望門足先歛惟有就君舍慷慨  
屢呼飯得匪王陽術獲此數豐腆君家漢之渚種蘭聞九  
畹梅花一百樹日日勞望眼苦被微名累德輝難一覽君  
覽輝不須盟霜雪又有盟且與計飽暖從此簿領間日日  
山房執手板方習士行勤難遂稽康懶我有文百軸零落失編

潛江舊聞四

十一

崇雅堂叢書

纂感君意良厚許與事雕鏟凡此懷抱真不同世情淺將  
無宮商應氣味有潛感所嗟冰霜時別緒轉難遣明日海  
門道悠悠自凌緬讀此詩可知兩人意氣相與之摯矣悔  
人之於天章詩當不少惜東浦集已佚不可得而見也  
朱悔人善畫

吳天章雯有過朱悔人詩注云時作匡廬圖又有題悔人  
三疊泉圖詩莫大岸與先有題王黃湄擁書萬卷圖詩注  
云是朱悔人得意筆然則悔人蓋精於六法矣悔人以詩  
名人皆知之而不知其能畫以此知古人之逃名陳香泉  
奕禧亦

有題悔人三疊泉圖詩見春靄堂集天章詩  
見蓮洋集大岸詩見抄本康熙潛江志殘稿

東浦學耕圖

萬雲蓀丈際軒語我曾友處得見悔人先生東浦學  
耕圖手卷卷首東浦學耕圖五字爲漁洋山人題卷後題  
詩甚多不悉記僅記朱竹垞吳天章二人作朱云上書空  
敝黑貂歸賣賦年來計漸非爭似爲農東浦畔醉吟獨速  
舞蓑衣老我青緇懶束腰薄田枕水傍溪橋明年準擬全  
家返也買烏犍種楚苗吳云雙鳩呼雨又呼晴東浦何人  
正餉耕蟹舍遙連平楚白柴門俯見下江清燒畚侵曉驅  
牛出飲社連朝荷鍤行莫訝逃名名轉盛耒邊終有漢書  
聲按東浦在潛城東南四十里其地風景最勝康熙甲寅  
悔人先公石戶翁移居於此瀕河構園廬榜曰宜莊云悔  
人雖客京師久然不無鄉土之思故寫東浦學耕圖以見  
意此自是吾鄉故實見諸何所藏弄何人惜爾時未一問  
及今不知尙在人間否也

和山堂詩

朱悔人先生在康熙間以詩名所著東浦詩鈔王漁洋宋  
牧仲朱竹垞爲之序人皆知之至所著和山堂詩則鮮知  
之者東浦詩鈔今已散佚無存若和山堂詩則更無從蹤  
跡矣蘄州顧黃公景星曾爲和山堂詩序畧謂潛江朱悔  
人名下士也逸山先生數爲余言今夏始相見讀其和山  
堂詩矜慎持擇如其人而滂薄瀟瀟沛乎有餘古詩自三  
謝以還近體則三羅而上皆能尋聲按節茹馥咀華朱子  
可謂篤志斯道者矣按黃公此序作於康熙十六年丁巳

蓋悔人丁巳以前詩題和山堂東浦詩鈔則丁巳以後之作耳黃公又有和山堂詩選序畧謂悔人復哀錄其和山堂前後詩若干屬予論定爲選若干以謂和山精甲在是悔人學勤而意壯不事門戶故無變更之煩而有自得之趣此吾所以選悔人也

兩序均見白茅堂集卷三十四

惜此選本亦不傳

### 莫大岸有博癖

莫大岸之爲人人皆知其博學能文而不知其嗜博王黃湄戲簡大岸詩云野水滔滔波浪白壞我禾稼中不憚簿書盈案懶更開願得快士爲博奕莫子瑰異人不知就局中夜費刻畫千場縱博無一勝黃金已盡仍自適高才昔日走中原詩句常卑鮑謝格身跨蹇驢輸傭者襍被獨作

### 潛江舊聞四

十三

崇雅堂叢書

薊門客丈夫忍辱當如此從此君名始通籍讀書最喜袁彥道脫帽呼盧衆辟易五月天氣殊清和芭蕉葉厚榴花赤聞君妙畫欲通靈何不攜來試一擲

大岸有黃鶴山樵畫最奇讀此詩寫大岸之性情活現紙上不減頰上三豪也

### 朱司理破漕艘匿尸案

朱顯公司理士達順治己亥進士康熙初任常州府推官多善政而檢漕艘得匿尸一事常人尤艷稱之林二者漕猾也窺寓客陳有量妻海氏貌美艷之賺量出逼海海不從林大怒手刃之匿尸漕艘中又募人刃量於途司理適監兌中夜恍聞嗚咽聲似出漕艘者驚起明炬入清米得海尸嚴鞫之具得林狀林窘極輦鉅金求道揮之卒論林

如法常人大快時方盛暑逾十日乃殮色如生常人建海烈婦祠有銀管集以張其事莫不重海之節烈而頌司理之廉明也

### 朱恪舒

朱司理長公恪舒能詩隨侍毘陵有南遊詩一卷常州董

文友以寧序之

見正誼堂文集

推挹甚至而縣志乃無其人

縣志有朱

士達傳第附載其孫未附其子故恪舒何名終不知也

問之邑人無一人知者幸有

董序存耳不然焉知吾邑詩人尙有朱恪舒其人哉

### 段天門丈人

康熙間潛江兩高士一爲灌園叟劉連俊一則天門丈人段陟雲也兩人生同時居同里同厲學行同甘肥遜同守

### 潛江舊聞四

十四

崇雅堂叢書

固窮之節一時有雙高之目而丈人詩名尤著潛民排水澤而居歲苦潦丈人有所感觸輒寓於詩以悲天憫人之懷寫流離困踣之狀其言絕痛邑宰王黃湄見其屯營隄歎嗟賞之以爲仁人愷惻之言可當詩史三原孫豹人徵君採風至潛見其詩歎爲小雅詩人之遺贈以詩有樂府古詩何奇崛讀罷爲爾聲暗吞之句丈人隱居東郭竹籬茅舍敝席爲門僅蔽風雨朱高安宰潛聞其高節屏驪從往訪避不納再三往乃得見煮茗清談而已咨以一邑利弊則曰潛人苦水復苦隄民力竭矣舒民力其先務也問其次則曰興文教厚風俗亦治邑不可緩者高安則大嗟歎之謂如此言豈徒治邑而已耶自後屢訪之月必再三

至丈人固終歲不一履縣宰之庭也高安憫其貧餽以薪米固不受曰吾豈以飢寒累縣宰耶高安以是益重之高安入相歲時致書存問二處士不絕二處士者灌園叟及丈人也丈人捐館舍高安尤惜之其寄灌園叟詩云與君偕隱者東郭段天門在昔貧尤甚而今命不存遺文誰與錄古道孰能敦慚愧交情在寸心秋雨翻亦可見其傾倒之至矣高安之禮賢下士丈人之執持高節論者兩賢之天門丈人以布衣老死北郭外大樂庵卽葬庵傍康熙五十一年縣宰吳元弑表其阡曰清處士段天門丈人之墓未幾縣河泛漲墓石俱沒矣嘉慶八年萬月峯先生更爲築墳立石甯雙梧孝廉熙朝有過丈人墓詩其詞曰窮年

潛江舊聞四

十五

崇雅堂叢書

東郭任棲遲遮莫哀音續楚詞經得相公品題後始知處士老工詩丹楓環水冷孤魂死日聲名更勝存七尺新墳三尺碣後人知有段天門歸路匆匆暮靄澄蓬蒿指點賴山僧憐君憐我須前拜重望非徒下馬陵庚申冬予返里過其墓道無復遺迹但見荒草叢蘆而已尋萬公所立墓碣亦無有爲慨歎者久之有詩云欲訪城東處士村可憐遺冢沒苔痕詩卷飄零何處覓祇今痛哭段天門余久欲重刻丈人詩集以徧覓舊本不獲頗用爲恨遺冢滅沒久矣里中不乏好義之士當有踵月峯先生之後而表其墓者

潛江劉掌園逵俊性孤介不肯隨俗俯仰長棄帖括肆力  
經史百家之學朱文端公宰潛時雅所推重與結布衣交  
嘗遊吳越燕趙周覽山水以寄其幽曠之懷倦游歸隱居  
城南灌園自給布衣蔬食不與世相聞自號灌園老人好  
事者爲寫灌園圖朱文端公有題灌園圖詩詩云硯田多  
歉歲爲圃足生涯湘岸千頭橘秦城五色瓜薤繁紅膩鏤  
浣葉綠沉沙時復荷鋤去移苗鄰叟家興會閒中適園林  
日夕佳雨晴蛙吹急風暖鳥聲諧碍竹敲機帽濡花濕笋  
鞋往來誰是伴鹿豕與吾儕百里內無山胸中邱壑間泉  
聲落戶牖藥氣上門關抱甕凌朝出攜筐薄暮還身勞心  
自逸未覺鬢毛班泉石帶幽壑高人歲月居鳥枝蟬叶韻

潛江舊聞四

十六

崇雅堂叢書

蟲葉蝕成書萬樹霜垂實連畦雨潤蔬有時耕鑿罷舉網  
得溪魚蓬蒿三徑靜溪鳥啄庭苔時有仙人至乞將靈藥  
栽鑿厓通水道選石疊花臺此外非吾分柴荆不浪開第六

首已見前

王子名成晚李生家計貧

王觀錄孝廉李時純茂才

與君居並里

惟我友三人郢樹江干暮燕雲日下春何時重聚首杯酒

話酸辛有客來漢上傳子致予言舊愛留紅雨

予宰潛於署中築紅

雨亭新詩負綠樽可能賣漿客重到信陵門聽說頻揮淚長

吟欲斷魂掌園有次韵荅可亭相國詩見潛江詩徵論者  
謂掌園高隱有幽人貞吉之致文端念舊有緇衣好賢之  
風均足千古也王霞九侍御贈芳曰朱文端公名臣大儒  
所纂藏書十三種風行天下而未聞其能詩卽其家所刊



文集數卷內亦無詩今讀此八首深情遠韻何減當時詩家廣平賦梅花固不獨其人之不可及矣

### 莫大岸遺文

鍾祥縣元佑宮東南烏衣巷有張星伯先生墓碑記邑人莫大岸筆也其文云公諱大任字口當號星伯弱冠游郡庠從學李本寧先生之門於書無所不窺一目輒不忘兼通武畧以氣節自許高談濶論聞者咸歎服李先生深器之崇禎壬午賊陷城執之誘以官不屈脅以劓奮起罵賊死事見鍾祥縣志結銜題高邑縣知縣莫與先記按碣末原有立碑年月已剝蝕矣考與先爲順治十五年戊戌進士授高邑知縣踰年卽引疾歸

見縣志

此碑結銜題高邑知

### 潛江舊聞四

十七

崇雅堂叢書

縣則立於歸田後無疑年月雖剝蝕然據此推之或立於順治末康熙初也大岸所著今是堂集已亡其文流傳絕鮮此記以刻石而存篇幅雖短固吉光片羽也李巽孚以打本示我錄之以備采入潛江文徵焉

### 舊志闕龔戴銓傳

王青垞曰潛江有以卑官而克樹名績於商城者爲龔戴銓字剡溪以康熙十九年六月二十二日蒞商城縣丞任器識遠大留心政務時民苦里役戴銓佐令令各里糧戶公議應輸以除報充之弊二十七年武昌兵變督鄉勇防禦邑得寧謐及官兵凱旋經商城檄戴銓護之出境市集無驚田禾晏然縣之糧冊混淆賦役不均知縣談永祚詳

乞丈勘戴銓搜訪舊案彙成定例請施行而豪強無隱占之弊愚弱省偏苦之累出自戴銓襄助之力居多縣人祔其主祀之談公祠並泐石紀其政績具載商城縣志名宦傳在丞任十二年擢四川成都知縣去任時歲貢王畧爲序送其行畧云吾商重大之事莫如田賦歷經衛談許諸公奉文區畫公於其間裁酌經營不遺餘力商之地畝弓口永爲畫一此則公之大有造於商也至將去商時汲汲告同人曰川中當加賦之日惟恐重則貽害其留心民瘼於成都也與留心民瘼於商無以異川首邑亦何幸得公以爲一方福星耶考畧爲明陝西巡按御史王倓孫卽當時盛稱義僕周元福所撫之孤也戴銓又有壽熊孝廉奕久之母張夫人詩云苦節曾經五十年星霜磨老獨全天丸成百鍊丹心結荻繪千條夜雨湔茹盡蘖冰堅壺內培開蘭桂秀階前聖朝母德能如幾雙鳳行看紫誥宣又有游三教洞步知縣許全學韻一律鵬雲曰以上皆青垞寫示我者具錄之藉補舊志之闕吾邑有此人以卑官樹名績商人立祠祀商志入名宦豈倖致者吾邑乃不之知舊志之罣漏豈少少哉

### 潛江詩社

嘉慶初年無錫顧崧圃錦春爲潛江傳經書院院長以詩學提倡後進故一時能詩之士輒結詩社相與講求聲病之學而方外之能詩者亦入焉如曹笨翁吳秦山吳東園

李濤岸蘇竹莊雪痕上人皆社中人也而甯雙梧爲之職志七年之間死亡相繼存者獨雙梧濤岸耳丙寅秋雙梧又與李香圃蔡霽園陳遠山袁菊圃萬琢庵朱也園胡石泉拂雲上人結冷釀詩社雙梧有新結冷釀詩社懷舊同社詩笨翁江陵人雪痕京山人香圃名大訓霽園名汝霖也園名繼智菊圃名濂桂秦山名堂拂雲名尙衣俗姓鄧住持法雲社與王其後霽園濤岸又與鄧遠山吳竹夢樓爲友皆潛人也

居葉舟上人結逃禪詩社葉舟者雙梧詩弟子也  
甯雙梧

烏程范白舫蹠漢口叢談潛江甯雙梧孝廉熙朝字柑堂少苦學工文尤溺於詩性樸實無華喜交游庚辰計偕缺資斧乃附舟東下臨覽吳越山水時有故交漢上劉硯夫

潛江舊聞四

十九

崇雅堂叢書

邦彥官姚江以書招下榻署齋因哀途中詩題曰庚辰游草爲付梓人漢江解纜云臥聽鄰舟語起看江水生催颿挂初日夾岸應鳴鈺黃鶴回頭渺青山拱手迎年年吳越夢今喜遂南征又云同里蔣嗜山履泰余總角至交也與雙梧稱莫逆交辛巳冬雙梧來漢介嗜山尺素訪余客舍因留小住半月地近卑誼歲將殘暮塵市中兩人每夕篝鐙高論尊酒狂吟比鄰聞之咸爲駭怪雙梧題余詩稿云江漢三千里巴歛七八年諸侯爭掃榻餘子漫隨鞭此集凡三變成名豈偶然請從蘭畹譜並向國門懸原注君舊刻有菴溪故漁隱詞又云詹湘亭明府時宰漢陽挖雅揚風爲士林推重雙梧與之有舊投刺一謁外餘不屑往也鵬雲按雙梧

所著柑堂詩鈔十六卷稿本未付刻所刻庚辰游草僅一年之作耳非其全也惟雙梧奇貧謀刻不易幸劉姚江篤念故交爲付剞人風義殊不可及其全集卒以無力付梓寢就散亡鄉人又無有好義如劉姚江者文人不幸窮於生前復厄於身後可慨也

萬榭香先生言行記

予少時喜就先公問鄉先生逸事先公曰道光間有萬榭香先生至性人也學人也抑循吏也其處家庭以孝聞兄弟六人相率左右承歡惟恐不得其意其教子弟懇篤而嚴肅課以經訓文詞必斤斤勉以務本之學嘗曰孝弟做人之本也讀書作文必以至性爲根柢始可經世如根本

潛江舊聞四

二十

崇雅堂叢書

之地有虧縱幸得科名又焉足取其居官不競名不喜功勤政愛民廉而能平厯宰徐聞樂昌龍川等縣牧連平德慶等州所至有循聲龍川人建祠繪象祀之連平顏魯愚總制雲貴時至述其治行爲僚屬勸牧德慶時虎夜渡河而去德慶父老傳爲美談梁編修國瑚爲作虎渡河記至比之東漢宗均劉昆則其循良治績有以入人之深可知矣傳聞其在職也每日鷄鳴起治事無一朝晏起者或問故曰夜氣猶存也其門人嘗問爲政之要則曰不外乎得民情恤民隱盡牧民之責而已匪惟言之實允蹈之所謂言行相顧者也其學精於許氏說文通小篆爲漢隸至工其鄉舉出張南山先生門所爲詩亦與聽松廬體格相近

予素喜談鄉先生遺事及聞先公言乃知萬先生學行政事均可爲後學師法故記之後又覓得虎渡河記知先公言信而有徵而先生政蹟亦可見其概矣附錄於此俾將來傳循吏者有考焉

梁國瑚虎渡河記云潛江萬榭香先生以楚北名解元出宰粵東歲丁未權德慶州篆爲政不煩民咸稱便暮年之間教化遂行州治依山素有虎患自先生蒞任虎夜渡河而去父老傳爲美談瑚聞而歎曰行何德政而至是乎抑事出偶然乎瑚己亥鄉試出先生門下時得晉謁知爲循吏先生嘗言爲政之要不外乎得民情恤民隱盡牧民之職而已瑚心識之今以傳聞軼事相證益信其言有徵謂

潛江舊聞四

二十一

崇雅堂叢書

事雖偶然亦常然可也昔漢宗均遷九江太守虎東遊渡江劉昆擢宏農太守虎負子渡河兩賢守治行爲東漢最在位無赫赫名而均退姦貪進良善昆以異政被徵帝稱爲長者是其安靜謹厚無愧循良與先生論治之言先後如出一轍故其治效同竊嘗論之虎猛獸也居山林無患於民其爲民患咎在殘吏吏以虐政害民是吏而虎也吏縱爪牙假威肆酷又虎而冠也孔子曰苛政猛於虎殆謂是歟夫民不畏眞虎畏吏虎眞虎之害不及城市吏虎之害無地可逃爲民除害者審所輕重而捕治之其害庶可並除也先生操司牧之權惠政及民禁網疏濶猛獸不擾宜哉瑚備員史官忝司載筆樂聞其事思爲循吏勸於是

乎記

郭夢蓮學博

郭夢蓮學博美彥幼負清才喜爲詩歲科試輒冠其曹聲名藉甚然數奇屢不得志於布政司試僅於道光己酉拔貢成均而已先一年戊申歲試郢中赴友人漢神廟賞牡丹之約有句云花本無心誇富貴天教平地起樓臺蓋卽得拔之兆也庚戌入京爲人題畫墨菊有句云籬邊莫笑無顏色要與秋風戰一場此則因朝考報罷而寓意秋闈者卒無所遇乃就學官補安陸教諭未幾以母老乞假歸養不及數年遽以疾卒有行無年人皆惜之樊樊山時爲傳經書院院長挽以詩云三楚論耆舊嗟乎我夢蓮勁秋

潛江舊聞四

二十二

崇雅堂叢書

凋碩果流恨滿黃泉有母松筠節遺孤襁褓年和丸曾五夜勗學亦三遷果入明經選應知畫荻賢劬勞償苜蓿冷宦奈烽烟言避鱣堂席歸吟獺涖篇靈蕙欣健在寸草獨殷然甘滑供親舍窮奢食硯田長貧悲白髮故物剩青氈多難張平子依人王仲宣此才胡不第當世竟誰憐奇字爭來問新詩到處傳七言尤卓犖萬象入彫鐫與我忘年契因之步履聯談經愧融帳識曲歎牙絃乍見蒙青眼重來亦宿緣每登孟公座預決祖生鞭直道孤生竹精心百鍊鉛琴樽良讌會杖履老神仙爲識獨居苦相過十日前期同佳節醉來賞月華圓鏡影妖蛇墮身宮磨蝎纏嘔心原況瘁斯疾竟沈綿聞道求醫藥頻煩問粥饘連宵驚噩

夢一夕速雲駢命也嗟何及天乎忍棄捐慈闈逾八十泉  
路杳三千淚血枯難繼愁魂望不還束芻餘舊雨哀草滿  
新阡宿榦今摧絕貧交感涕漣跡留塵榻畔腹痛酒爐邊  
渺渺聞長笛悠悠歎逝川招魂成一慟愁霧罨江天

時辛未秋

八讀此詩則學博之學行可以得其大概矣

### 潛江烈士

咸豐四年髮逆餘黨竄潛沔士紳多練鄉團自保潛江西  
鄙則廩生戴自培庠生唐廷鑑監生董熺國等主之分地  
設防互爲聲援且守且戰以故逆黨不敢越長塢淵而西  
蚌湖多寶灣李家洲乾河諸戰前後殲逆賊千三百餘人  
賊膽落將遁矣會別股悍匪麇至連檣而進水陸交攻鄉

### 潛江舊聞四

二十三

崇雅堂叢書

團力不支遂潰自培創死熺國忿極投河死廷鑑被擄脅  
以威不屈死時五月初一日也是役也力戰而死者千餘  
人婦女老弱倍之事平奉旨優卹監利王子壽比部有潛  
江烈士行記此事也其詞曰書生仰天背雙裂誓馘豺獮  
飲其血潛江烈士有戴君慷慨大義日陳說懦夫攘袂盡  
敢決六萬健兒起團結妖賊蠡屯潛沔劫堡攻村往復  
還火光宵熱仙桃市殺氣晨高多寶灣君聞赴難親躍馬  
援旗大呼震屋瓦揮戈疾鬥賊不支髑髏藉藉敞原野仲  
夏再戰氣彌厲孤軍陷伏後無繼水深浩浩蒲青青烈士  
捐軀堪隕涕失我外援空號咷四千殘骨委蓬蒿凶徒高  
歌血洗刀悲風捲地揚怒濤當時大帥高連營人言殺賊

惟書生書生何嘗有祿秩婦孺爭傳烈士名君不見湘鄉  
羅羅山江陵林立甫並起書生奮材武威稜忠節照吾楚  
戴君戴君亦其伍世無韋布出禦侮誰信儒林有貔虎

### 益田遺詩

兄益田縣學生少攻舉子業善詞賦屢踏棘闈不獲售遂  
絕意進取爲童子師自給家屢空晏如也喜讀古人詩不  
常作作輒工性孤介非所有不取嘗曰不自食其力而取  
非所有君子恥之時抱甕灌園與田夫野老爲伍見者不  
知其爲士人也生平不入官府遇達官貴人若將浼焉有  
二子皆先卒詩文遺稿身後散失殆盡歲甲寅曾以感懷  
二詩寄我今尙在篋衍存者僅此而已詩曰荒畦抱郭斜

### 潛江舊聞四

### 二十四

崇雅堂叢書

辛苦作人家揚子一區宅東陵五色瓜哦詩銷歲月學圃  
足生涯富貴非吾願祇嗟兩鬢華城南灌園叟獨行是吾  
師先輩去已遠高風猶可追不聞戶外事懶檢篋中詩把  
鑱鬪黃獨苦心當告誰讀此詩可以想見其爲人矣其蘄  
向乃在灌園老人故其行誼亦與之相近惜不得如高安  
相國者表章之耳灌園老人者邑中高士劉連俊也